

編號 4 號

【甘蔗下个蟬仔】羅紫云原作

屋脣該埕¹竹甘蔗²種幾下年咧，當大叢，斬忒又會過綻筍，繼續煞猛生到青里里仔，長目多汁，清甜好食。

逐年大體對五月開始，日日到臨晝仔，就會有一群著等青衫，當靚、當得人惜，頭大尾尖、翼長个草蟬，細細仔像手指尾恁大隻定定，黏在這長長青色个甘蔗葉下，盡命拈在該啦歌哩曲，鬧熱煎煎。佢兜總係唱等：「揸揸揸咿³——揸揸揸咿——」甜美个歌聲，一直到下晝兩點零正會煞棚，完全無喊恹。

草蟬下班，續等嫲牯蟬⁴跔等上棚，毋過，嫲牯蟬係黏在竹甘蔗脣該叢榮榮个苦楝樹頂，佢算係最大隻个蟬仔，膺身著等一身烏色个西裝盡派頭，大聲唱等屬於佢兜个愛戀歌：「蟬——蟬蟬蟬！蟬——蟬蟬蟬！」佢兜做下背等一臺自家製造个放送頭⁵，亮亮个聲放送到盡遠都聽得著。佢心情好个時節，就安腦佢兜唱歌仔當好聽，心情毋好時，又試著佢兜吵耳塞窟。但係一想著佢兜

來到這世界上，斯有短短幾日仔，就當佩服佢兜恁勇敢、恁煞猛打拚个精神，來完成唯一愛做个聲事⁶——傳宗接代，該就無麼个好怨嘆，乜原諒佢兜个嘶胥另命咧。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，曉得照順序、有條理，成時獨唱、成時合唱輪等來，像有人指揮樣，聲音有嘹亮、低沉；時大、時細，所發出个聲無幾共樣，有个較尖；有个較溫柔。其實，蟬仔有當多種，有一年、三年、五年、十三年、十七年个，長年都戴在泥竇肚不見天日。在暗摸摸个烏泥裡肚，培養破土个熱情；在多年个等待中，化地底个能量做聲量，衝破重圍飛出來，就係為著這短短幾日个自由。

佢心肝肚緊想：這埕甘蔗無落肥，敢係因為聽了蟬仔熱情嘹亮个歌聲，正緊生緊高緊榮？該恁人，乜愛像蟬仔恁知足，知恩圖報，逐日天轉笠嫲花，這一生人就多姿多彩咧！

¹ 埕：音 pu；量詞，堆。

² 竹甘蔗：音 zhug gam` zha`；綠皮的甘蔗。

³ 揸揸揸咿：音 rham+ rham+ rham+ rhi；草蟬的叫聲。借字。

⁴ 嫲牯蟬：音 ma gu` sham；此指臺灣熊蟬。

⁵ 放送頭：音 fong` sung` teu；麥克風。

⁶ 聲事：音 shang` she+；工作。

編號 6 號

【金黃色个旅行】曾雪蓉原作

旅行係一種當好个休閒活動，做得分人心情鬆爽，又做得膠最靚个回憶留下來，另外旅行也係一種學習，有一句話講：「行萬里路，贏過讀萬卷書」，在旅行个時節，一路看著个、聽著个，可能比在書寶肚學著个還較精彩、生趣。

在印象裡肚，佢最懷念个一擺旅行，係前幾年俾八月半个時節，爺哀帶佢歸屋下人去花蓮遶寮。

佢兜來到花蓮富里个六十石山，一路上感覺花蓮个空氣特別好，一聲又一聲大鷄婆歡喜又自在个歌聲，響在彎彎幹幹个山路町，佢兜盤飛在高高个雲頂，打開梟雄个翼胛，無分日夜在這遍山頭巡邏，佢兜係這遍天地个山大王，也係保護者。

等阿爸撈車仔停在忘憂亭，佢一下車就看著滿山滿坪个金簪花¹開到當關、當打眼，想起識在電視裡肚看過一隻紹介花蓮金簪山个節目，講這位係一隻靚到會分人「發狂」个所在，這句話正經半點都毋會爭差。在佢企在這高高个涼亭時節，看著歸遍个山頭，變成金黃色个世界，帶等泥香、野花香个山風在對面吹過來

該下，毋知仰般，佢个心肝頭就有一種感動還有幸福个感覺，佢想這就係大自然个力量。

阿爸講：「前人種樹後人涼，前人種竹後人搖。」這山頭个金簪花，係盡多前人開山打林開墾出來个，所以來到這邊寮个時節，愛曉得珍惜，毋單淨愛撈這美景用相片帶轉屋下，也愛撈自家个垃圾處理好，恁樣年年正有靚靚个風景好欣賞啊！

在夕陽像一隻啾紅个柑仔，掛在天邊个時節，本旦開到盡有精神个金簪花，像約定好共下下班樣，全眨等目珠互相偎憑，恬恬仔睡忒咧；難怪金簪花又安到「一日美人」，佢跔等朝陽跣床，又在日頭落山時節，合起佢錫人个花裙，做一隻靚一日个美人。

時間過忒盡久，成時佢還係會想起該擺「金黃色个旅行」，當像又聽著大鷄婆歡喜个歌聲，盡久……盡久。

¹ 金簪花：音 gim` zam` fa`；金針花。

【炭下該頭杌仔樹】徐秀英原作

戴在鄉下，屋脊種有幾頭樣仔¹樹、牛眼樹、杌仔樹，係當平常个，一到打子个季節，管佢有熟也無熟，總愛食得得个東西，細人仔絕對無放佢煞。若係吵著睡當晝个叔公、叔婆，分佢大聲追走，該下晝就無戲好唱咧。

佢屋下就在伙房个最尾析，崎仔溜啊下就係礪炭，炭下个圳溝係細人仔熱天个天堂，洗身仔、庠魚仔、捉蝦公、釣蛤蟆蚵仔，想得到个空頭，麼个就搥得著來搞！該頭杌仔樹就對炭下个石壁生出來。

阿婆當好食這頭个黃杌仔，見看著杌仔會食得該駁仔，佢就會怙等拐棍仔行兼來撈佢這兜細啞仔講，青杌仔食了會屙硬屎，愛等佢黃正好食。細人仔嘴町應講好，一群豺狗哪管得核²佢兜該張嘴，幾雙賤手摘著个，全部就拿來塞嘴空咧。該兜生到忒樹尾摘毋著个，阿爸就會擎竹篙又去剪下來，較硬个佢會自家食忒，較熟个佢會放到米缸裡背，翕加兩日仔正拿去阿婆間肚。無牙齒

个阿婆，糜³啊糜仔，面町滿足个笑容，到這下佢都還記得。

該頭杌仔樹頂，長下會有青啾仔⁴飛來作竇。青啾仔毋驚人，佢兜在樹下搞份家啦，佢在樹頂啾啾滾飛來飛去。細人仔雖然番綻，毋過從來毋識去撞過佢个竇。較盤擎个會蹶上石壁去算看仔，鳥竇裡肚有幾多隻卵。一駁仔後，樹頂又加加幾下隻得人惜个細鳥子咧，就恁樣生生不息。

樹頂也有膨尾鼠跳上跳下，還有共樣毋驚人个山狗太、狗嫲蛇趕來趕去。膨尾鼠尾絨絨，當得人惜，屋下食伸个果子抑係果仁、果皮放在樹下，佢兜會輪等跳過來食，咕嚕咕嚕个目珠仁迂迂轉⁵，就像驚人來搶食樣，實在還生趣。山狗太、狗嫲蛇就無恁得人惜咧，因為佢个皮膚有保護色，在佢撈樹梗抑係燥葉仔喂兼个時節，一無注意就會分佢嚇著，所以佢盡惱山狗太。

恁多年過去咧，炭下該頭杌仔樹早就無在咧，毋過，該童年个回憶，哪久就恁香甜个園在佢心肝肚。

¹ 樣仔：音 son`er；芒果。

² 管得核：音 gon`ded hed`；管得住。

³ 糜：音 moi`；指因沒有牙齒而用牙齦磨食物。

⁴ 青啾仔：音 ciang`ziu er；綠繡眼。

⁵ 迂迂轉：音 din`din`zhon`；轉來轉去。